

Agong berkenan lancar Tafsir Pimpinan Ar-Rahman Edisi Rumi Baharu

Raja Hisyam Raja Zaid

September 9, 2022 11:00 MYT



Yang di-Pertuan Agong Al-Sultan Abdullah Ri'ayatuddin Al-Mustafa Billah Shah berkenan mencemar duli bagi melancarkan Tafsir Pimpinan Ar-Rahman Edisi Rumi Baharu. - Astro AWANI

KUALA KUBU BHARU: Yang di-Pertuan Agong Al-Sultan Abdullah Ri'ayatuddin Al-Mustafa Billah Shah hari ini berkenan mencemar duli bagi melancarkan Tafsir Pimpinan Ar-Rahman Edisi Rumi Baharu.

Menurut Menteri di Jabatan Perdana Menteri (Hal Ehwal Agama) Datuk Idris Ahmad, ia bersesuaian dengan perkembangan zaman dan berpandukan teras dalam ilmu tafsir serta tadabbur Al-Quran.

Malah jelasnya tafsir tersebut juga telah mengambil kira pandangan alim ulama dalam negara sebagai rujukan sebelum ia dikeluarkan.

"Tafsir Pimpinan Ar-Rahman Edisi Rumi Baharu ini sewajarnya diangkat menjadi rujukan rasmi umat Islam di Malaysia," katanya ketika menyampaikan ucapan aluan pada Majlis Lawatan Kerja Yang di-Pertuan Agong ke Darul Quran serta pelancaran Tafsir Pimpinan Ar-Rahman di sini hari ini.

Dalam masa yang sama katanya, kerajaan sedar untuk membangunkan masyarakat yang sejahtera, pembangunan rohani dan isaniah masyarakat perlu menjadi agenda utama.

Menurutnya, Kampus Darul Quran di bawah seliaan Jabatan Kemajuan Islam Malaysia (JAKIM) misalnya, telah melahirkan lebih 10,000 graduan huffaz yang berperanan sebagai ulama profesional dalam membangunkan ilmu dan sahsiah masyarakat ummah.

"Ada dalam kalangan graduan huffaz ini sedang bertugas sebagai pensyarah akademik dalam bidang Al-Quran, Qiraat dan tafsir.

"Ada juga berkhidmat sebagai doktor, Pegawai Hal Ehwal Islam, Pegawai Tadbir dan Diplomatik, peguam, jurutera dan sebagainya," katanya lagi.

Kampus Darul Quran ini juga katanya telah menjadi model pengajian tahfiz yang tersusun dan berkualiti.

Malah kesan terjadap modul pendidikan ilmu agama yang dipraktikkan juga telah membuahkan hasil yang sangat positif.

"Alhamdulillah syukur, kesanya telah melahirkan pula institusi tahfiz seperti MRSM Ulul Albab di bawah kendalian Majlis Amanah Rakyat (MARA), Sekolah Agama Bantuan Kerajaan (SABK) Tahfiz serta Sekolah Tahfiz Model Ulul Albab di bawah kendalian Kementerian Pendidikan Malaysia (KPM)," katanya lagi.

Kerajaan sebelum ini juga katanya, telah pun memperuntukkan sebanyak RM140 juta bagi tujuan penyelenggaraan dan menaik taraf institusi-institusi pendidikan Islam termasuk untuk tahfiz dan juga sekolah-sekolah agama.

Selain itu kerajaan melalui JAKIM juga baru-baru ini telahpun memperuntukkan lebih RM1.06 juta kepada 75 orang penerima baharu yang terdiri daripada para huffaz untuk menyambung pengajian di peringkat Ijazah Sarjana Muda.